

Camara di Comercio a reuni cu Minister di Husticia

Comerciantenan ta preocupa pa nan siguridad considerando e desaroyonan di bishitantenan ambulante procedente di Venezuela



DIALUNA, 2 di november ultimo Camara di Comercio y Industria (KvK) a reuni cu Minister di Husticia, mr. drs. Arthur L. Dowers. KvK a pidi e reunion debi n'e preocupacion cu ta reina entre comerciantenan rib'e tema di siguridad. Esaki mas aun considerando e ultimo desaroyonan pa locual ta trata e bishitantenan ambulante procedente di Venezuela, cu lamentablemente ta creando un impresion general di inseguridad.

Durante di e reunion KvK a trece e diferente preocupacionnan di e comerciantenan bao atencion di Minister pa Minister por duna su punto di bista y por elabora un poco riba kico su departamentonan ta haciendo pa cu e tema di siguridad.

Security agent

Mas y mas comerciante ta wak e necesidad pa contrata un "security agent" pa por protegenan empleadonan y propiedad. Sinembargo e sentido di inseguridad ta keda presente ya cu no ta permiti un "security agent" cana arma. For di e punto di bista di Minister un "security agent" toch tin un autoridad basta amplio. T'asina cu sigun ley ora un persona comete un acto castigabel cualkier ciudadano por detene e persona aki y entrege n'e autoridad concerni. Pero ora ta trata di un acto peligroso, unda tin

personanan arma, no ta consehabel ni tampoco ta spera pa ningun hende actua contra di e personanan aki. En bista cu e peligro ta hopi grandi ta preferibel pa laga Polis mes atende esaki. Ademá Polis mes no ta usa nan arma sin mas, ma solamente den casonan sumamente peligroso y/o extremo. Pesey Minister ta di opinion cu si duna un "security agent" e autorizacion pa usa arma, manera ta e caso den algun pais, esaki lo ta mas bien un riesgo grandi cu por ta peligroso tanto p'e "security agent" mes, como tambe pa otro personanan y cu ta mihor pa evita esaki pa preveni cualkier eventualidad. E uzo di "pepperspray" dor di un "security agent", na unda e resultado lo ta menos grave, lo por ta un opcion, pero lo mester delibera mas tocante esaki.

Grupo di chat

Ultimo tempo, conhuntamente cu diferente gremionan y gruponan di interes, a introduci un grupo di chat via social media. Den caso cu tin algun inquietud of ta sinti inseguridad por manda menshae y/o tips via e chatgroup y en bista cu recherche y otro autoridadnan ta forma parti di grupo aki, e autoridadnan concerni por reacciona mas lihe rib'e casonan concerni.

Vigilancia di camera

Minister a elabora cu tin un grupo special di Polis cu ta atende cu e proyecto di vigilancia di camera. Di punta pa punta di Aruba (di Lighthouse te cu Baby Beach) a instala mas o menos 2000 camara na luganan strategico.

N'e momento aki ta trahando rib'e instalacion di coriente y coneccion di internet.

E uzo di e camaranan ta pa por yuda soluciona casonan hudicial y no t'e intencion p'e camaranan tin bista riba y/o ta den cura di residencianan.

A instala algun camara caba den Caya

Grandi y den e area di hotel. Minister a caba di ricibi e concepto di ley y

despues esaki lo wordo entrega nan Staten. Ora e ley wordo aproba y drenta na vigor, Minister lo elabora mas rib'esaki y tambe lo duna varios sesion informativo pa cu e funcion di e camaranan.

Ley di Identificacion Obligatorio

Den pasado tabatin e ley di identificacion obligatorio, unda cu un opstoring sambtenaar (Polis) por a para un persona y pidie p'e muestra su identificacion. Minister a splica cu e ley aki a wordo elimina paso tin hopi turista di diferente pais cu ta bishita Aruba y cu por ta discriminatorio ("profiling") pa controla un persona si y otro no y/o haci distincion entre turista y habitantenan di nos pais.

No obstante, durante un inspeccion preventivo si ta permiti p'e funcionario concerni puntra e persona cu ta wordo controla pa un identificacion. Tambe den cierto caso por hasta opta pa aplica e ley di vreemdelingenwet.

Actualmente ta trahando rib'un landsverordening cu lo regla un ke otro pa areanan cu tin risico (p.e. centro di ciudad cu tin adictonan ambulante ta circula) y e.o. lo permiti pa haci control y eventualmente retira personanan cu ta causa problema for di e areanan aki. Tambe Minister a enfatisa cu ta tumando accion fuerte contra dunadonan di trabao cu ta emplea trahadonan ilegal y ta impone un multa cu por suma te cu AWG. 100.000,- pa caso.

Criminalidad bou Hubentud

Minister a splica cu ta alarmante cu e edad di e hobennan cu ta comete criminalidad ta bahando. Ta trata di muchanan di apenas 11 pa 12 aña cu ya caba ta horta.

N'e momento aki tin diferente proyecto pendiente pa trata e problematica aki, pero no tin e recurso financiero pa por inicia e proyectonan. Minister ta haci un apelacion pa eventualmente por duna un contribucion – financiero o den otro forma – p'asina por sigui cu e proyectonan aki. A base di proyectonan cu si a wordo ehecuta por a nota un cambio considerabel den a actitud di e hobennan. Si tin interes pa yuda, por tuma contacto cu Ministerio di Husticia.